

INUIT ATAQATIGIIT

Inatsisartuni



12. december 2018

Inatsisartut Suleriaasianni § 37 imm. 1 naapertorlugu Naalackersuisunut apeqqut imaattoq matumuuna saqqummiuppara.

Naalackersuisunut apeqqut:

1. Nunatsinni inuit innarluutillit atuagarsornikkut, inuttut inooqatigiinnikkullu ilinniartuunnaasaat periarfissat suuppat aammalu sumiippat?
2. Inuit innarluutillit ilinniarnertuunngorniarfinnut (GUX) ingerlariaqqittartut ukiut ingerlanerini qanoq amerlatigippat? Qassit ilinniarnertuutut naammassisimappat?
3. Inuit innarluutillit ilinniarnertuutut qaffasinnerusunut ingerlariaqqittartut ukiumiit ukiumut qanoq amerlatigippat aammalu sumut ingerlariaqqittartat?
4. Inuit innarluutillit ilinniarnerminnik naammassinnillutik sulinermut inuussutissarsiornermullu ingerlaqqittartut ukiumiit ukiumut qanoq amerlatigippat?
5. Inuit innarluutillit sulisinnaasutut nalunaarsorneqarsimasut qassiuppat?
6. Inuit innarluutillit ilinniarsimangikkaluarlutik suliffeqartut suliffeqarfinni sorlarni sulisorineqarnerusarpat?
7. Inuit innarluutillit suliffeqarfinni pisortat ingerlataanni aammalu namminersortut suliffeqarfiutaanni sulisorineqartut akissarsiaqartinneqarnerat nalunaaquttap akunneranut ataatsimut qanoq annertussuseqarpa?
8. Inuit innarluutillit inuussutissarsiornerup iluani aningaasatigut isertitaat ukiumiit ukiumut agguaqatigiisillugu qanoq annertussuseqarpa?
9. Naalackersuisut siunissami inuit innarluutillit ilinniartitaanerisa nukittorsarneqarnissaannut qanoq pilersaaruteqarpa?
10. Naalackersuisut inuit innarluutillit sapinngisamik amerlanerpaat sulisinnaangornissaat isumaannaarniarlugu qanoq pilersaaruteqarpa?
11. Nunatsinni inuit innarluutillit ilinniarnissamat periarfissaqannginnertik pissutigalugu, ukiuni kingullerni tallimani nunanut allanut ilinniarsimasut qanoq amerlatigippat? Tamanna aningaasanngorlugu qanoq naleqarpa?
12. Inuit innarluutillit nunani allani ilinniarnerminnik naammassinnereerlutik nunatsinnut qassit

angerlartarpat aammalu angerlanngitsoortarpat?

13. Naalackersuisut sammisamut tunngatillugu soqutiginarsinnaasumik arlaannik ilanngukkusutaqarpat?

(Inatsisartunut ilaasorta q Aqqa Samuelson, Inuit Ataqatigiit)

Tunngavilersuut:

Apeqqutini paaserusunneqartuni inuit eqqarsartaatsimikkut innarluutillit aammalu inuit timimikkut innarluutillit pineqarput. Taamaattumik apeqqutini pineqartuni inuit innarluutillit pineqartut tamarmik ataatsimut isigineqarput, pitsaassaarli taakkununga paasisutissat immikkoortillugit Naalackersuisunit saqqummiunneqarsinnaasuuppata.

Nunatsinni inuit innarluutillit ilinniartitaanerisa inuussutissarsiummillu ingerlataqarnerisa ukkattuarneqarnissaat pingaaruteqarpoq. Inuit innarluutillit inuttut allatuulli pisinnaatitaaffeqarlutik, inuiaqatigiinnilu ilinniartitaanerup inuussutissarsiornerullu iluani naleqartinneqarlutik misigisimanissaat pinngitsoorneqarsinnaanani. Taamaattumik inuit innarluutillit ilinniartitaanermikkut inuussutissarsiutinillu ingerlataqarnerat erseqqinnerusumik paasisaqarfigissallugu misissussallugulu soqutiginarpoq.

Inunnik innarluutilinnik oqaloqatiginnissimaneq aallaavigalugu, Nunatsinni inuit innarluutillit ilinniarnissamut periarfissaat pitsaanerpaannginnerat oqariartuutigineqartoq paasinarluarpoq. Inuit innarluutillit inuttut allatuulli pisinnaatitaaffeqarlutik ilinniakkamik aallartitserusuttaraluarput, aporfilersorneqartarsimallutilli. Inuit innarluutillit oqariartuutigivaat, ilaatigut Majoriaq-mut ilinniarnissaminnut kajumissuseqarlutik piginnaasamikkullu naleqquttutut inissisimasut qinnuteqartaraluarnerminni itigartitaasarsimasut. Nunatsinni inuit innarluutillit atugaat, ilinniartitaanerat inuussutissarsiummillu ingerlataqarnerat ataqatigiinnerusumik aaqqissuuttariaqarpoq.